




Fasnacht 2019

Sujet: **Mir wüsse nit...?!?!**

Das Joor isch es bsunders schwer
wo nähme mir es guets Sujet her
mir froge eus vor dr Fasnacht es paar Sache
was darfsch no alles scribe, mole oder mache
und au unterem Joor gits e hufe
wo mir nit richtig chönne ischtuefe
den nach langem Studiere isch es sowit
hämer euses Sujet: **Mir wüsse nit...?!?!**

Fange mir a bi eusem FCB
do hesch die beschte Zyte au scho gseh
mit em Motto: „Für immer rot /blau“
goht's in d'Hose ganz genau
e Vorstand völlig inkompetent
wo alli nume viel Stutz vediene wänd
drum falte mir zum Bäte beidi Händ
hoffe das Debakel bim FCB isch gli z'Änd

Im Fuessball gits so e blau/wissi Horde
die sind Hirn mässig scho benochteiligt worde
möchte nachem FCB Match randaliere
und am liebschte alles demoliere
tüend ufem Heimwäg s`Hirni usschalte
und in Prattele dr Zug ahalte

Bim Telebasel gits so e Gritte
die will uf dr Erfolgswälle rite
will als Bachelorette en Fründ finde
do bisch geistig scho bitz hinde
drum isch d'Adele vom Telebasel nit ganz bache
und was isch bi ihre ächt, usser ihr blöds lache

An dr Fuessball-WM gwünne mir nit emol e Bluemetopf
au sind dr Xhaka und dr Shaqiri nit die Hellschte im Chopf

tüent d'Serbe mitem Doppeladler provoziere
dass zeigt nit grad die beschte Maniere
wäge dene trinke mir nümm uf eimol 10 Radler
us Angscht mir gsehnd den dr Doppeladler

D'Wält muess wieder farbig si
do sind mir z'Prattele au voll drby
in ganz Prattele tuet me investiere
und überall d'Strosse neu markiere
froge eus wo isch do dr Sinn
und sind so gäli Streife ufem Trottoir „In“

Sit Joore ässe mir mit vollem Mumm
dä Schoggihufe mit inne Schuum
obwohl jo alli das süesse Ding tüent kenne
wie darf me das den jetzt genau nenne

Dr leschti Summer isch mega heiss
me het nit dörfe Fүүr mache was jede weiss
es git es Verbot für Fүүrwerk und Grill
für Hund und Chatz isch es schön still
drum würd's eus das Joor gfall
gäbtis wieder en 1. Auguscht ohni Knalle

Es sait dr Fritz zu sim Fründ em Walter:
„Ich hol mir jetzt es Bilette am SBB-Schalter“
Do sait dr Walter in aller Rueh:
„Us dem wird nüt, den dr Schalter isch zue.“
D'SBB tuet nüt vo Kundedienscht halte
sunscht hätte mir no dä SBB-Schalter

Au bi dr BVB laufte nit grad rund
dört isch s'Arbeitsklima gar nit gsund
Fehler bi de Trämli tuet me finde
S'Haltstellmarkiere verschiebt me nach hinde
und zum Schluss mir finde das dumm
werde als Krönig d'Schiene no chrumm

Z'Prattele hämer e Guggemusig
die spiele super... gar nit grusig
sind im Grosse und Ganze gar nit ghemmt
gönd de Prattler Fasnacht immer fremd
ob Köln, Charivari oder Wiehnachtstattoo
fiere sogar Geburtstag „Juhu“
Mir froge eus drum und müesse leer schlugge
si d'Nachfalter jetzt e Event oder e Fasnachtsgugge?

So jetzt hämers doch no chönne richte
es paar Vers zu eusem Sujet dichte
au dr Wage wird drzue passe
dö wänd mir gar nit gspasse
mir hoffe ihr begriffet alles das wär dr Hit
nit dass ihr nachher säget: „**Mir wüsse nit...?!?!**“

will Fasnacht ohni Wüsse muesch gar nit versueche
dass säge euch die ahnigslose Dorfplatzrueche